

Noticia
Transparente
di Gobierno

ISLA ONLINE

Diabierna 16 Augustus 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



Entre aña 2024 y 2025 Gobierno ta aloca mas di 16 miyon florin UN TOTAL DI 20.884 PENSIONADO DI SVB A HAYA UN AUMENTO DI REPARATIE TOESLAG

Prome Minister Evelyn Wever-Croes a elabora durante Conferencia di Prensa di Gobierno di Aruba diahuebs 16 di juli, riba varios aumento di entrada cu a wordo duna na luna di juli recién. Un di e aumentonan tawata esun di e reparatietoeslag pa e pensionadonan di SVB.

Prome Minister ta remarca cu e grupo di pensionado cu ta hayando e aumento di e reparatie toeslag ta un grupo hopi grandi di 20.884 persona cu a haya un aumento di 360fl extra pa aña. Como cu e aña aki e aumento a wordo paga desde juli 2024, e gastonan ta di 3.2 miyon florin y pa aña 2025, cu lo ta un aña completo y tambe ta inclui e bonus



PENSIONADO

● AUMENTO DI REPARATIE TOESLAG

CANTIDAD HENDE	20.884
CANTIDAD AUMENTO	360 PA AÑA
CANTIDAD GASTO 2024	AWG. 3.200.000
CANTIDAD GASTO 2025	AWG. 12.900.000

di fin di aña, e gastonan lo ta 12.9 miyon florin extra.

“Tin critica den comunidad cu ta bisa cu 360 florin no ta yega pa nada. Pero pa Gobierno por a paga e 360 florin aki mester a aloca pa e aña aki so, mas di 3 miyon florin y pa aña 2025 esaki lo ta casi 13 miyon florin. Gobierno semper lo sigui traha na bienestar di e pensionadonan di Aruba. Nos no por haci tur cos hunto pero si mi lo sigui bringa pa trece alivio pa cada un di nan”, Prome Minister a indica.



Gabinete Wever - Croes II



STABILIDAD
Y PROSPERIDAD
2024

Prome Minister Evelyn Wever-Croes:

AUMENTO DEN BIJSTAND PA ESNAN CU LIMITACION "GEHANDICAPTEN UITKERING" DI 1.4 MIYON FLORIN PA 2024 Y 3 MIYON PA 2025



Diahuebs ultimo a tuma lugá un conferencia di prensa yama pa Prome Minister Evelyn Wever-Croes pa elabora riba e topico di finansas público y e alivio cu a ser duna na comunidad por medio di aumento di entrada. Prome Minister a splica cu Gobierno a duna aumento no solamente na empleadonan público, empleadonan di sector priva, y pensionadonan, sino tambe na esnan cu no por traha y ta haya "gehandicaptén uitkering".

Prome Minister a indica cu na Aruba tin un total di 1400 persona cu ta ricibi "gehandicaptén uitkering", y e aumento cu nan lo ricibi lo ta di 1,560-florin pa aña. E gastonan di Gobierno pa duna e alivio aki ta di 1.4 miyon florin pa 2024, y 3 miyon pa 2025. Gabinete Wever-Croes ta y lo sigui traha na bienestar di e comunidad y di esnan mas den necesidad.

“E meta di Gabinete Wever-Croes ta pa trece progreso den cada hogar, dunando alivio financiero, pa asina yuda mehora e poder di compra di tur esnan cu a wordo afecta pa motibo di inflacion. Aruba ta progresando, y Gobierno lo sigui trahaduro pa logra trece e progreso aki den hogar di cada ciudadanodí pais Aruba”, Prome Minister a expresa.

GEHANDICAPTEN UITKERING

● AUMENTO DI ONDERSTAND

CANTIDAD HENDE	1.400
CANTIDAD AUMENTO	1.560 PA AÑA
CANTIDAD GASTO 2024	AWG. 1.400.000
CANTIDAD GASTO 2025	AWG. 3.000.000



Gabinete Wever - Croes II



STABILIDAD
Y
PROSPERIDAD
2024



Minister Maduro di Finansa ta informa:

ARUBA TA LOGRA REFINANCIA DEBENAN EXISTENTE RIBA MERCADO INTERNACIONAL DI CAPITAL NA UN MANERA EXITOSO

Dialuna lo brinda mas informacion den conferencia di prensa



Pa Minister Maduro di Finansa e ta un satisfaccion grandi pa por informa cu Aruba ta logra subi mercado internacional di capital na un manera exitoso. Despues di un ausencia di 3 aña debi na e daño financiero causa pa e pandemia, Aruba ta logra pa refinancia debenan bieu cu ta madura den aña 2024 na un bon interes. Ta trata di un transaccion financiero di 134.5 milyon dollar na un interes di 6.3%. Dialuna awo, Minister Maduro lo splica mas di e transaccion exitoso aki pa Aruba den un conferencia di prensa.

Minister Maduro ta gradici e banconan Santander y Citi cu a yuda e mandatario den ful e proceso aki di bay bek mercado internacional di capital na un manera exitoso. Na e ekipo di

profesional di Aruba cu a sa di presenta e storia di recuperacion financiero y economico di Aruba na un manera eficaz, e mandatario ta manda un danki di curason pa nan esfuerzo y amor demostra pa nos Pais. Mas cu claro Minister Maduro ta gradici nos bon Dios pa su guia, sabiduria y pasenshi pa yud'e lidera y logra trabounan grandi na bienestar di Aruba.

Minister Maduro ta gradici specialmente e inversionistanan existente y esnan nobo expresando, "Thank you to all investors for your trust and believe in Aruba. We look forward to a good relationship where Aruba may be in your thoughts and in your hearts." Masha danki!

MINISTER MADURO DI CULTURA TA FELICITA PASTOOR CANUTO 'TOTI' FUENTEBELLA PA SU 25 ANIVERSARIO COMO PASTOOR NA ARUBA



E siman aki Minister Maduro di Cultura a ricibi Pastoor Canuto 'Toti' Fuentesbella kende recien a cumpli 25 aña trahando como Pastoor na Aruba. Den un encuentro ameno Pastoor Toti aconpaña pa dos parokiano di Paradera, sra. Jeanette Croes y sra. Miriam Jansen, Pastoor Toti a conta di su yegada na Aruba, sirbishi den diferente distrito y di su trabou na e Parokia Santa Filomena na Paradera na unda e ta predica y brinda sosten na e comunidad Catolico.

Pastoor Toti a nace na Philipinas y na un edad hopi jong, despues di 3 aña di a ordena como Pastoor, na aña 1998 ela bin Aruba pa asina por yuda den guia spiritual como Pastoor. Den un tempo relativo corto Pastoor Toti a siña domina nos idioma Papiamentu y a adapta y siña conoce y aprecia nos cultura. Pastoor Toti a sirbi Misa den diferente parokia e.o. na Santa Cruz, Savaneta, San Nicolas y na aña 2007 Pastoor Toti a bay na cabes di e Parokia Santa Filomena na Paradera.

Minister Maduro a entrega Pastoor Toti su decreto gubernamental, carta di felicitacion y un bunita recuerdo pa su 25 aniversario. Di su banda Pastoor Toti a duna e mandatario un bendicion y tambe a brinda Minister Maduro un bunita rosario y un yabero di Pader Pio, cual e mandatario a aprecia masha hopi.

Minister Maduro ta felicita y gradici Pastoor Toti pa su 25 añanan dedica na e trabou sacerdotal na bienestar di Aruba y cu Dios brinde hopi bon salud pa econtinua cu su bunita trabao spiritual predicando e palabra di Dios. ■■■





MINISTER DI TURISMO TA ORGUYOSO PA ANUNCIA CU AMSTERDAM MANOR BEACH RESORT ARUBA TA CELEBRA 25 AÑA DI COMPROMISO FIRME DEN SOSTENIBILIDAD



Diaheubs Atardi Minister di Turismo y Salud Publico, Sr. Dangui Oduber a atende e 25 aña di celebracion di Amsterdam Manos Beach Resort (AMBR) cu nan compromiso firme den sostenibilidad y esaki a inclui un decada cu nan demostra di ta un ehempel clave pa un turismo consiente di medio ambiente cu nan “Master Certification di Earthcheck”.

Durante 25 aña, Amsterdam Manos Beach Resort su relacion cu earthcheck no a keda limita na un certificado so, sino a bira un compromiso cu e balornan di sostenibilidad y un maneho responsabel di practicanan cu ta proteha nos medio ambiente. For di e momento cu AMBR a bira e prome resort na Aruba pa haña e prestigioso certificado aki, semper nan a carga esaki como nan identidad y promesa pa continua den mehora y bira un rol model pa otro resortsnan.

Minister Dangui Oduber ta menciona mirando pa futuro, e vision pa sostenibilidad ta sigui expande. Amsterdam Manor Beach resort ta un bon ehempel con nan a baha gasto nan cu particanan sostenibel manera:

- Preservacion di awa a baha nan consumo general pa 20%.
- Consumo di energia usando e systema di VRF a reduce nan consumo cu 21%.



- Replasando gas y diesel pa e energianan renovabel y usando solar a yuda reduci entre 19 y 21%.
- Residuos di cuminda y practicanan di recicla hunto cu e NGO localnan a yuda baha e cantidad di desperdicio

Minister Oduber a keda impreciona cu tur e practicanan cu AMBR ta implanta den nan trabounan diario pa asina demostra cu turismo responsibel por bay man cu man cu e preservacion ambiental. Como minister di turismo su vision ta pa mas hotels y vacation rentals por cuminsa implementa iniciativanan aki pa un turismo mas responsibel y pa promove Aruba como un destinacion cu ta inverti den impacto positivo pa e medio ambiente y naturelsa.

Finalmente, Minister Dangui Oduber kier gradici e Managing Director, Jorgen van Schaijk y full su ekipo di Amsterdam Manor Beach Resort pa e invitacion y pa comparti nan contribucion na medio ambiente di e isla. Nos meta mester keda pa guia e responsabilidad di sostenibilidad pa Aruba por tin un turismo sostenibel.

Minister Dangui Oduber: “Laga nos sigui lidera cu proposito y enfoka ariba un pais sostenibel pa e futuro generacion por disfruta di dje”.



MINISTER ENDY CROES A RICIBI SELECCION DI TENNIS DI ARUBA CU A TITULA CAMPEON DI DAVIS CUP AMERICAS GROUP IV 2024 NA TRINIDAD Y TOBAGO



Minister di Enseñansa y Deporte Endy Croes a ricibi bishita di e tenistanan: Kyle Frankel, Patrick Sydow, Frederick Sydow y Jay Wernet, kendenan a titula campeón di Davis Cup Americas Group IV 2024 recientemente na Trinidad y Tobago. Sr. Franz Sydow, kende ta presidente di Tennis Aruba y coach di Selección di Aruba Sr. Claudio Martinez tambe tabata presente na e ocasion special aki. Durante e encuentro e tenistanan a comparti nan experiencia di e torneo di Davis Cup. E Selección di Aruba tabata hunga den grupo cuater (4) y tabata invicto. Den e partido final Aruba a gana Nicaragua y a wordo promovi pa grupo tres (3).

Den number di Gabinete Wever – Croes II, Minister Endy Croes a felicita e atletanan y haci entrega di e medaya di 4D pa sigui inspira y motiva nan. “Nos lo sigui sostene nan y ohala cu nan por sigui crece cu e dedicacion y inspiracion cu nan tin y por etala nan mes pa dentro di algun aña nan yega grupo 2. Pronto Aruba lo mira desaroyo grandi den e disciplina di tennis”, Minister Endy Croes a enfatisa. E mandatario di Deporte a duna un primicia cu den Parke Curason na Jaburibari lo bay construi 2 cancha di tennis. Además di esaki, Sr. Sydow y su directiva ta trahando riba un bunita proyecto pa e barío di Dakota, cual nan lo anuncia ora ta asina leu. “Nos t’ey semper pa duna nos sosten na e proyectonan bunita asina,” e mandatario di Deporte a enfatisa. Sr. Claudio Mendez a expresa di ta hopi contento y orguyoso cu e resultado aki y a indica cu desde



tres (3) aña pasa Team Aruba ta trahando y a train hopi duro durante varios luna pa competi den e torneo aki. “E resultado aki nan ta dedic’e na tur esnan cu ta hunga e disciplina di tennis y Pueblo di Aruba. Ta hopi importante pa e hubentud practica deporte. Nos ta sigui traha duro pa conquista un titulo mas,” Sr. Mendez a indica.

Sr. Franz Sydow, kende ta presidente di Tennis Aruba ta sumamente orguyoso di e logro di Team Aruba y a enfatisa cu nan lo sigui traha duro pa sigui hunga riba e nivel di mas halto. E tenista Kyle Frankel a comenta cu e aña aki e torneo a bay hopi bon mes. Team Aruba a logra gana tur nan weganan y a logra e Group Stage, esaki ta nifica cu nan a gana tres (3) wega tras di otro y den e wega final a gana Team di Nicaragua cu e score di 2-0. “Tur aña tabata un hopi bon experiencia, pero ora bo gana esey ta bunita y memorabel cu bo lo corda pa resto di bo bida,” Frankel a enfatisa.

Frederick Sydow, miembro di e Tennis Team di Davis Cup a expresa di ta hopi contento di por a trece e aña aki e medaya di campeón pa Aruba. E ekipo di Aruba a traha duro y entrena pa oranan largo pa por competi den e prestigioso torneo aki. Pa conclui, Minister Endy Croes a felicita e tenistanan cu nan logro y a gradici nan pa pone Aruba su number briya riba plataforma internacional. Alabes a desea nan hopi éxito den futuro. ■■■



Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

2024

AÑA DI STABILIDAD Y PROSPERIDAD